

Gij Senjcwz Ceiqndei Gou

我的最佳选择

Singhiz haj mwh cuengqhag, daxbuz lumj bingzseiz nei daeu ciep gou.

De itmienh bek aenmbaq gou itmienh angq dwk naeuz: “Mwngz rox lwi, daxgoeng ngoenzneix aeundaej mbawgaj gunghgyauh gingqlaux lo, de gvaqlaeng naengh ci couh mbouj yungh cawx fei lo.” “Ndei lai lo, daxgoeng naengh ci bae caeuq baengzyoux guhcaemz couh mbouj lau lumz daiq cienz lo!” Gou naeuz.

“Goeng mwngz ngoenzneix youq ranz cawj haeux ne.” Daxbuz naeuz, “Mwngz ngoenzneix couh dawz mbawgaj gingqlaux daxgoeng daeu naengh ci ndaej lo. Neix dwg mbawgaj gyauhdungh gou, neix dwg mbawgaj gingqlaux daxgoeng, cuengq youq doxcaez, gou hwnj ci gonq, mwngz youq baihlaeng cat gaj, swghih yawj mbouj raen law.” Gangj le daxbuz couh dawz mbawgaj gingqlaux daxgoeng caeuq mbawgaj gyauhdungh de caez oet hawj gou.

Gou dawz song mbaw gaj neix, hainduj yaemhywx lo: Gou wng mbouj wnggai yungh mbawgaj daxgoeng ne, gou mbouj wnggai yungh, bingzseiz lauxsae mbouj dwg itcig son dou yaek guh boux vunz lauxsae ndeu ha? Siengj daengz gijneix, gou dawz mbawgaj gingqlaux daxgoeng ndenq hawj



daxbuz naeuz: “Yienghneix guh mbouj ndei ba.” Daxbuz youh oet hawj gou, daengx gou mbat ndeu naeuz: “Mbouj danggya mbouj rox fwnz haeux youz gyu bengz, naengh baez ci ndeu noix gyau song maenz ngaenz, ndwen ndeu ndaej mbaet roengz mbouj noix ne.” Gou cij ndei dawz song mbaw gaj neix gaem youq ndaw fwngz, hoeng roxnyinh song mbaw gaj neix sawqmwh bienq ndaej gig ndaek, gou

dawz de gig mbouj cwxcaih.

Gvaq yaep ndeu, cigunghgyauh daeu lo, dou hwnj ci le, daxbuz lij sing iq doiq gou naeuz: “Geiq ndaej cat mbawgaj daxgoeng bw.”

Mwh cawx fei, gou cat mbawgaj gyauhdungh daxbuz gonq, mwh ngamq siengj dawz mbawgaj gingqlaux daxgoeng okdaeu, naj gou fwt ndat-fwdfwd—— mbouj ndaej dam bienzgeiz bienq-baenz boux mbouj lauxsae mbouj soujsaenq ndeu ha. Yienghneix, gou dawz mbawgaj gingqlaux vaiqvet cuengq haeu daeh bae, dawz song maenz ngaenz okdaeu, cuengq haeu aensieng coux ngaenz bae. Daxbuz raen le, bwnda nyaeuq lo, mboujgvaq gvaq yaep ndeu, bwnda nyaeuq haenx youh mbe bingz lo, got gou ndaetndae youq henz ndang.

Ci menhmenh hai bae, gou yawj funghgingj daj henz cueng gvaqbae haenx, yienhndaej daegbied gyaunde, sing duz roeg hemq haenx hix lumjbaenz daegbied ndeidingq.

Baez senjcwz neix, gou guh deng lo. Guh boux vunz lauxsae soujsaenq ndeu, mbouj dwg gig angq ha?

(Sanghaj Swghfan Dayoz Fusuz Vaigozyij Siujoyz haj nienzgaep Cangh Cuhhau)



Yindung Gimqien

禁烟运动

Daxboh dwg boux ienyinx okmingz ndeu, moix ngoenz cungj yaek cit song bau ien, ndaw ranz gingciengz hoenzngeungeu, daxmeh vih neix mbouj noix caeuq daxboh doxceng, couh dwg yienghneix, daxboh moix ngoenz ciuqyiengh “hoenzien mbouj gat”.

Ngoenz ndeu gou cuengqhag ma ranz, ngamq haeu dou daxboh couh heuh dawz gou, heuh gou bae bang de cawx ien, mwhde, daxmeh ganjgip oknaj lanz gou. Gou riu dwk doiq daxmeh naeuz: “Meh, mbouj miz maz law, cit ien mbouj miz maz vaihcawq ya, dauqfanj lij miz mbouj noix ndeicawq ne.” “Mbouj ndaej luenh gangj, gaej hawj daxboh daiq vaih mwngz lo.” Daxmeh gig yiemz doiq gou naeuz, daxboh raen gou ndwn youq mbiengj de, daeieq raixcaix.

Gou yawj dwk daxboh, mbouj gaenj mbouj menh naeuz: “Mbouj loek ha, ndeicawq citien miz sam fuengmienh: Daih’ it, duz ma raen bouxcitien couh lau, couh deuzbae; daihngieih, bouxcaeg mbouj gamj haeu ranz bouxcitien caeg doxgaiq; daihsam, bouxcitien engqgya ndangcangq baenz coz.” Dingq gij vah gou le, daxmeh doeksaet dwk aj bak ngabngab, daxboh hix ngunhngwd lo, yungh lwgda cim yawj dwk gou. Gou ciep dwk naeuz: “Daih’ it, bouxcitien dingzlai laeng goz, duz ma baez raen couh laihnaeuz de cingq gip au gyaeuycien moeb de ne, de mbouj lau ha?” Daxboh saeknaj de gig doeksaet. “Daihngieih, bouxcitien gyanghwnz ae lai, bouxcaeg laihnaeuz de caengz ninzndaek, ndigah mbouj gamj haeu jbae caeg.” Mwhde daxmeh riugan yawj dwk daxboh. “Daihsam, gingciengz citien saeknaj ndaemndwt, ciengzciengz hawj vunz roxnyinh de ndangcangq, yienhndaej nienzcoz.” Daxboh daej riu mbouj baenz, daxmeh engq dwg got dungx riuhaha, daxboh anjw naeuz: “Dahniq, seizneix majhung lo, hag daxmeh mwngz guh ‘yindung gimqien’ lobw.”

Gvaqlaeng, daxboh citien yied daeu yied noix lo.

(Gyanghsuh Gauhyouz Vaigozyij Yozyau Sigijfungh Vwnzyozse Vang Sih)

Gou Siengj Bang Fwj-hau Ra Aen Ranz Ndeu

我想为白云找个家

Duj fwzhau ndeu mbin ha mbin, de siengj ra aen ranz ndeu ciengxlwenx youq gizde.

De ra daengz go faex sangswd ndeu, ngamq siengj venj youq gwnz byaifaex, couh mbin daeu duz roeggacak ndeu. De doiq fwjhau naeuz: “A, mwngz caen lumj ndaek faiq ndeu, itdingh gig unq ba, gou gamz mwngz ma ranz, hawj gou guh denz ba!” Gangj dwk, couh mbin gvaqdaeu, siengj gamz de bae.

Yienghneix, fwjhau vaiqvet mbin bae lo.

De mbin gvaq goengq youh goengq bya sang, gwnz bya roeg rwenz va hom, hoengheiq singsien. Fwjhau ngamq siengj venj youq dingjbya, couh buet daeu sam duz lingz. Miz duz lingz ndeu naeuz: “Vaiq yawj, de geijlai lumj ndaek dangzfaiq ndeu ha! Dou bae gaeb au de, cimzcimz van mbouj van!” Vah ngamq gangj sat, sam duz lingz

couh coemj hwnjbae.

Yienghneix, fwjhau caiq baez deuzbae lo.

De mbin gvaq doengh naz ndeu, yawjraen boux canghdajveh iq ndeu cingq dajveh. Gwnz veh miz nazmeg, miz dujva, miz dah iq, miz giuz iq, hoeng mbouj miz fwjhau gwnzmbwn. Yienghneix, fwjhau couh mbin haeu fukveh de bae, fukveh bienq ndaej engqgya gyaunde lo.

Mwhde, lauxsae byaij gvaq-daeu, haen de veh ndaej ndei, daegbied dwg duj fwjhau haenx, caen ndei yawj. Canghdajveh iq ndaej haen le, ndawsim angq raixcaix.

Fwjhau hix gig angq, aenvih de ra daengz aen ranz gyaunde lo.

(Sanhdungh Swngj Gauh-cingh Yen Gauhcwngz Cin Fanz-linz Siujoyz Mung Swjyauz)

